

ARMENU NA VOTA

Amicu
ru' rrica ti scrivu
unni ti ricu ti pienzu
e i ma peni ti cuntu
ccâ spranza ca prestu tu tuorni nti mia.
Jàiu ntô labbru na stizza r'amaru
e na spina ntô cori
e gghjàju
appizzati ru' pila nnâ lingua
propria ntâ punta :
Tu, se vvieni, m'aiùti a pputilli scippari
nca putissi parrari cciù cciararu
cciù allecru cciù aruci
e putissi sta vuci pp'amuri na canzuna cantari
armenu na vòta nnâ vita
e virriri a gghiènti cu mi senti
e ccu si vòta.

Appuòi, se vvuoij,
na manu mi runi a spustari sta pethra
ca supr'è pieri mi pisa
ri tàgghiu propria ntê ita
nca putissi u passu alluncari
e ccùrriri e ssautari
e pputissi macari ccu-ll'ali abbulari
jàutu
armenu na vota nnâ vita
e vvirriri u munnu siennu ch'è ttunnu
cu è ch'è fila cci tira
e comu gghira.

Ma â sira
prima ca scura
vuogghiu turnari â casa
e stari suliddhu
'rricugghiutu
ar'aspittari
macari mutu
u rriestu rô juornu
e rà vita
ca scùrrunu i peni comu veni.